

Turista a cay for di cabay y fractura su braza



ORANJESTAD (AAN): Dialuna atardi den careda di 6'or un persona a yega Warda di Polis di Noord y avisa agentenan cu na Rooi Santo na altura di e cancha di tennis un persona a cay for di un cabay y e ta herida.

E patruya di polis a bay mesora eynan y na yegada ta

bin topa cu un dama herida kende a cay for di un cabay. El a fractura su braza den esaki.

Un ambulans a ser manda den direccion di e lugar di e accident y na yegada e victima turista a ser hiba hospital pa asina e haya tratamiento medico.

Gobernador a dicidi cu ta extradita David Cybul

Merca a garantiza cu lo dun'e atencion medico apropiada

ORANJESTAD (AAN) -- Ayera merdia David Cybul interna den hospital a haya e carta caminda Gobernador a autoriza su extradicion pa Merca.

Ta asina cu despues cu Corte Superior a manda nan Conscho pa Gobernador, a sigui un proceso caminda a manda busca asistencia di Hulanda via Minister di Asuntonan Exterior. Gobernador mr. Koolman tambe a manda busca informacion for di Merca encuanto e tratamento di Cybul mirando su estado di salud.

Investigacion cu DIARIO For di Hulanda a bin hefe di "Hoofd Bureau Justitiële Gezondheidszorg Ministerie van Justitie te Den Haag", prof.dr. H.J.C. van Marle y Th.J. de Man consehero medico di ministerio di husticia di Hulanda pa mira e situacion di Cybul. Tambe a busca conseho di e cardiologo drs. H.N. Steward y psiquiatra drs. G.E. Matroos. Nan a duna nan punto di bista riba e situacion di Cybul. A base di e consehonan aki Gobernador mr. Koolman a firma pa extradita Cybul pa Merca.

Durante tratamento di e caso den Corte Superior, claramente por a mira cu Procurador General mr. van Dalen no tabata interesa mes

den salud di David Cybul. E parti humanitario no ta conta pa mr. van Dalen. Durante tratamento di e caso e dokter di Cybul, dr. Blume, a duna un splicacion amplio di e situacion di Cybul.

Dr. Blume a bisa Corte Superior bon cla cu Cybul su situacion ta critico y cu e no ta conseha pa e viaha bay Merca pa e pasa den e mesun situacion cu su ex patient Jossy Arends.

Mr. van Dalen no a haci caso di dr. Blume y hasta a bisa cu e no ta kere den su declaracion. El a menciona e raport di cardiologo Steward cu ta opina otro cu dr. Blume. Dr. Blume a remarca cu drs. Steward a basa su mes riba e informacionnan cu el a haya pero e documentacion di Cybul no tabata contento y el a laga traha un acta di esaki tambe. Segun dr. Blume tabatin investigacionnan anterior di Cybul cu ta mustra claramente cu su situacion ta serio pero den un forma inesplicable e informenan aki a desaparece.

Apesar di e splicacion di dr. Blume mr. van Dalen a keda cu su punto di bista y esey a causa cu for di Hulanda a manda van Marle y de Man pa bin haci un investigacion pero en realidad nan no a haci mucho cos. Apenas nan a tuma presion di Cybul y esey

tabata tur cos.

Gobernador a basa su mes riba e consehonan cu el a haya y a autoriza e extradicion.

Director di Kabinet di Gobernador mr. Baker a manda un comunicado caminda e ta bisa cu basa riba raportnan di diferente medico y psiquiatra pero den e decision di Gobernador ta menciona un psiquiatra y ningun caminda ta mira e observacion di dr. Blume. Segun e raportnan no tin ningun circunstancia a base humanitario cu mester nenga e extradicion.

Segun Gobernador di parti di Merca a duna suficiente garantia cu asina Cybul haya su sentencia, ariba su peticion, e lo por bay sinta su castigo na Aruba despues cu a transforma e castigo segun nos leynan.

Ademas Merca ta garantiza cu Cybul lo haya e tratamento adecua durante e tempo cu e lo keda na Merca.

Awor Cybul por cuminsa un caso contra e decision di Gobernador. No ta conoci si lo trata e caso aki cu porta habri. Ta asina cu riba peticion di e abogado di Cybul a trata e caso di extradicion cu porta cera y pesey no a publica nada di e caso. Ta di spera cu e caso contra Gobernador lo worde trata cu porta habri.

Na Aeropuerto...

Dos Dominicano gara cu cocaina den boter

ORANJESTAD (AAN): Incansablemente funcionarionan di Douane ta lucha contra di traficantenan. E palabra "mula" lo mester ta pasando pa pasado, mirando e cantidad di traficantenan cu a worde deteni e ultimo lunanan, riba teritorio nacional Arubano ta supera e cifra di 50 detencion.

Un cantidad di stranhero di diferente nacionalidad ta sera na e momentonan aki na KIA. E instituto ta birando un Mini Nacionnan Uni. Tanto homber y muher ta cay den gara ora cu nan trata di bula e control na Aeropuerto.

Ultimo dianan, Douane a bolbe pone man riba dos homber, cu tabata na punto di aborda American Airlines. Den nan poder a worde descubri cantidad di Cocaina em-

botea cla pa transporta. Un gasto enorme ta cay riba gobierno relaciona cu e detencionnan aki.

Tin di e traficantenan no tin moda segun nan pa paga ni un abogado. Ta via di gobierno nan ta solicita uno pro-deo pa worde defendi den corte di justicia. Ademas ta bin acerca e gastonan cual ta cay riba presupuesto di KIA. Esnan deteni recien relaciona cu traficanan ta procedente di Republica Dominicana. Nan lo mester tabata tin contacto aki sea cu un of mas paisano cu lo a prepara e boternan pa nan transporta pa New York segun informe.

Straño ta di henter e asunto aki ta, pa kico nan no a viaha directo desde nan Pais pa Merca. Autoridad competente aparentemente lo ta tras

di un pista nobo di e red aki. Muy en particular e ultimo tempo tabata tin varios traficantenan Dominicano cu a cay durante di e control estricto, entre otro na aeropuerto internacional di Aruba.

Tambe a keda confisca mas di 4 kilo emboteya di Cocaina segun informe. Segun informe cu Autoridad lo busca den tur forma pa infiltra den e "Domrep Coca Red" aki, A worde usa un tactica aparentemente nobo pa desvia saliendo for di republica dominicana pa Aruba, hospeda algun dia riba suelo Arubano pa asina continua na viaha pa Merca.

Esnan cu a worde deteni ta Juan Rifero biba na New York 51 aña y Ricardito Mota cu tin 23 aña.